

PREDGOVOR

Posttraumatski stresni poremećaj (PTSD), kao problem koji obuhvata svjetske razmjere sa alarmantnom zastupljenošću u zemljama nakon rata ili katastrofa, sa svojim pridruženim posljedicama u vezi je sa dugotrajnom nesposobnošću velikog broja ljudi. Aktualnost PTSD-a, kao teme, potenciraju kako mnogobrojni ratni sukobi tako i terorističke akcije i katastrofe širom svijeta, koje nose sa sobom niz socio-ekonomskih, kao i različitih drugih promjena, u sklopu ekstremnog katastrofičnog kratkotrajnog ili dugotrajnog (hroničnog) stresa visokog intenziteta.

O tome koliko je velik socijalno-medicinski značaj ovih psihopatoloških stanja govori i razvoj posebne subdiscipline psihijatrije koja se bavi proučavanjem reagovanja pojedinaca i grupa u stresnim situacijama i liječenju istih (tzv. "Stress" ili disaster psihijatrija). To umnogome pomaže rasvjetljavanju mnogih otvorenih pitanja.

U ratnim i poslijeratnim uslovima u žiži interesovanja domaće i strane javnosti, ali i istraživača i kliničara, nalazi se upravo PTSD. Žalosna je činjenica da su se istraživanja Posttraumatskog stresnog poremećaja iz raznih zemalja proširila i na naša područja obuhvativši populaciju ranije Jugoslavije i da nas je rat mnogo naučio o traumatskom stresu.

Skroman doprinos savladavanju poteškoća u oblasti PTSD-a predstavlja i ova knjiga tako koncipirana da može poslužiti kako profesionalcima tj. psihijatrima, doktorima, psiholozima, defektolozima, tako i običnim ljudima da na jednostavan način spoznaju kako elementarne činjenice tako i savremene trendove i dostignuća u ovom domenu.

